

欽定剿平粵匪方略

欽定勦平粵匪方略卷一百五十九 丙辰年

七月十八日 癸酉 福興彭玉雯奏言向榮前田金

陵退師丹陽憂憤焦勞舊疾舉發復於上月二十八日力疾督陣感受暑熱病益加劇連日延醫調治無如年近七旬氣血就衰且因軍務喫緊憂勞過度精神日益委頓延至七月初九日未刻出缺應如何優卹之處出自

天恩至現在攻勦一切事宜由臣福興督同總兵張國樑等照常辦理不敢稍涉疏懈現當籌勦喫緊之際應請

旨迅賜簡放大臣前來接辦以重軍務奏入

上諭內閣曰欽差大臣前任湖北提督向榮由行伍疊次出師滑縣喀什噶爾等處以備弁洊升專闡蒙皇考宣宗成皇帝超擢提督久歷戎行戰功屢著前因

禦製醫方略卷一百五十九

著加恩開復提督賞還花翎卽照提督軍營病故例
賜卹並賞給一等輕車都尉世職任內一切處分悉
予開復應得卹典該衙門察例具奏卽孫向恩等三
人著俟服闋後由吏部帶領引見其靈柩回籍時著
沿途地方官妥爲照料用示朕褒嘉忠藎至意

上又諭內閣曰怡良著暫署欽差大臣督辦江南軍務
同日駱秉章奏言官軍自連破袁州城外賊營

後賊急邀臨江安福萬載殷匪助逆固守五月十五日道員劉長佑分三路進剿賊從南門蠡擁而出教諭劉坤一等分投截擊斃賊二百餘名餘賊收隊入城十八日賊由洪塘向珠樹潭進發圖撲瀏勇營盤軍功崔大光等帶勇馳擊衝殺十餘里斃賊四百餘名是日劉長佑派隊分攻袁州府城誘賊出戰亦斃賊百餘名二十

五日賊分三路來撲營壘劉長佑開壁縱擊賊大奔潰追至城根始還是日斃賊三四百名二十六至六月十五日疊次攻城擒斬賊匪數百名此袁州一路援軍攻城獲勝之情形也同知蕭啟江等於克復萬載縣城後瑞州新昌上高臨江之賊互相紆約分屯於縣東南北三面意圖復陷萬載五月初八日賊匪直薄都司田興

恕等營壘經我軍擊敗須臾賊隊大至官軍屹
立不動迨賊近前始開放槍礮擊斃甚多賊乃
潰走蕭啟江等復分路追殺大獲全捷共計斃
賊一千數百名十九日賊復糾集各處股匪齊
撲官軍營壘蕭啟江等督勇衝擊逾時賊始敗
潰我軍追抵江南八角亭燒其營壘四座各營
分路縱擊共斃賊千餘名六月初三日探報僞

國宗楊義青自金陵擁賊一萬並合各股敗匪
前來前隊已至距萬載縣城三十里之帶塘地
方將撲官軍營壘初五日蕭啟江等派令湘勇
分路進擊賊從田隴蠶擁而至守備楊恆升等
橫截而出縱橫衝突賊遂四散狂奔追逐二十
餘里直抵柏木地方收隊是戰共斃賊二百餘
名此萬載一路勦賊獲勝之情形也是日鄂省

所派援江之同知銜曾國華知縣劉騰鴻參將
普承堯同知吳坤修等亦經臣札飭由瀏馳抵
萬載縣城軍威更壯蕭啟江等遵檄助攻袁州
府城二十至二十七日劉長佑與蕭啟江疊次
環攻賊負隅不出曾國華等於十七日進攻新
昌之方塘斃賊二百餘名十八日乘勝進攻新
昌縣城賊之大隊已遁一鼓拔之二十五日直

趨上高劉騰鴻普承堯等分兩路進守城之賊
洞開城門劉騰鴻等先分隊截其出路直入城
中立斃悍賊二名賊遽駭走官軍分隊追之共
斃賊百餘名遂復上高縣城聞各路敗匪萬餘
均聚瑞州府城官軍已於二十九日拔營前
臣擬飭諸路一面相機搜剿將傍近股匪次第
殲除賊如出城援應即可乘機痛剿儻仍負隅

一城則枝葉彫枯本根亦當自萎似亦反客爲主致人而不致於人之一說也至袁州萬載兩路援軍已增至八千有餘閱時半載前後共獲三十餘捷在事各文武實屬不避艱險著有微勞所有最爲出力人員謹先開列數名可否仰懇

天恩獎敘以勵軍心其陣亡之外委劉祖貴因傷殞命

之外委杜家星並懇

部從優議卹以慰忠魂奏入

上諭內閣曰此次援江各軍疊獲勝仗連克新昌上高
縣城勦辦尙屬得手著卽乘勝進攻盡殄醜類同知
蕭啟江著以知府卽選教諭劉坤一著以知縣卽選
並賞加同知銜都司田興恕著以遊擊留於湖南補
用並賞給尙勇巴圖魯名號守備楊恆升著以都司

留於湖南卽補並賞換花翎都司劉培元著以遊擊
升用先換頂戴外委崔大光著以千總拔補並賞加
守備銜守備黃三清著以都司補用並賞換花翎陣
亡外委劉祖貴因傷殞命之外委杜家星均著交部
從優議卹其餘出力員弁兵勇准其查明保奏候朕
施恩

二十日
乙亥何桂清奏言東壩賊匪前由定埠東

夏攻撲建平壘經秦如虎等擊退臣恐該逆復
圖衝竄飛飭秦如虎江長貴趕緊分兵進紮東
夏定埠二處以杜賊蹤向榮亦派明安秦分兵
會紮定埠聯絡聲勢本月初四日江長貴自建
城移營甫抵東夏初五日黎明卽有大股賊匪
由東壩牆至趁我軍營盤未定分路攻撲該署
鎮所帶兵勇先已大半退避僅餘兵勇千名退

守橋西求援城內秦如虎並無援應祇得且戰
且退仍回建城現在賊亦不敢進攻而東夏仍
難扼守江長貴自稱統率無方稟請奏叅旋接
秦如虎函稱江長貴移營時先行派交兵勇二
千五百名又於初四日添撥兵勇一千五百名
護紮營盤並於初五日間警續添兵勇六百名
前往應援半途退回等語伏思江長貴所帶兵

勇如果不先行潰散已不爲單秦如虎添助兵
勇如果能迅速往援尤爲不少此次賊來撲營
我軍雖未敗衄而事機已屬遲誤 臣查江長貴
本係前保徽郡得力之員是以張芾屢次來函
令其再往徽郡幫同防守乃與秦如虎互相齟
齬致失事機該署鎮稟請奏叅咎無可辭相應
請

旨將署皖南鎮總兵江長貴交部嚴加議處並將接應
遲延之前任雲南楚雄協副將秦如虎交部議
處以示懲儆至東夏定埠一帶爲溧水東壩下
竄最要之路必須有進無退方能保固藩籬江
長貴與秦如虎稟報兩歧顯係各存意見臣已
飛飭知府仲孫懋迅卽幫同秦如虎嚴密防剿
以專責成其江長貴一員卽令前往徽郡交張

蕭暫行派防聽候

諭旨並飛咨向榮嚴催明安泰進紮定埠會剿毋得再
存觀望奏入

上命軍機大臣傳諭怡良福興張國樑曰逆賊由東夏
定埠屢撲建平希圖內犯前已疊降諭旨責成明安
泰迅將東壩克復以固要衝本日據何桂清奏江長
貴扼守東夏兵勇退縮已飭令折回徽州並飛催明

安泰進紮定埠等語東夏定埠已在東壩之下爲內
竄必由之路現在僅有秦如虎一軍扼守建平而逆
賊來路未絕豈能杜其窺伺怡良現旣暫署欽差大
臣全軍皆歸調度未可專談之浙江致滋貽誤丹陽
軍營兵力縱不能分明安泰一軍不下五六千人何
以不能克復東壩亦不聞進紮要隘但令株守一隅
著怡良等卽飭該總兵迅速督兵前進扼紮定埠地

方卽將占踞東壩之賊奮力擊退以保內竄之路儘有託故耽延卽著怡良據實叅奏

上諭內閣曰署安徽皖南鎮總兵江長貴前任雲南楚雄協副將秦如虎經何桂清飭令進紮東夏定準二處防堵江長貴所統兵勇因東夏營盤未及紮定被賊攻撲遽行退避輒稱秦如虎無兵援應與秦如虎續報撥兵應援情節不符顯係各存意見江長貴著

交部嚴加議處並著何桂清飭令前往徽州仍交張
芾差委秦如虎接應遲延亦屬咎有應得著交部議
處以示懲儆

二十三日

戊寅

胡林翼奏言黃州城內逆賊屢於

雙鳳山修築礮壘官軍於六月十二日進攻斃
賊五百餘名立將礮壘平毀其攻樊口之軍三
千人於十三日渡江正在合力以取黃州而各

路報稱逆賊石達開自金陵糾衆上犯湖口逆
匪亦併力上竄詐稱五萬已到者實不過三萬
人搜得石逆僞文調江西臨江府城之賊從義
甯通城來擾上游又稱現於安慶彭澤等處造
船運礮以資水賊之力蓋賊之力爭江漢其蓄
謀固已狡矣臣思三千餘人觸暑遠征倖而獲
勝此次賊數較多必非三千人所能獨禦且臣

之後路歧途甚多其由義甯至蒲咸者一路由興國至崇通者一路由大冶出金牛者一路均可擾臣營之上由武昌縣出華容葛店者一路其擾土橋豹子澥青山者又分爲數路均可擾省城之下禦於此必遺於彼遂於二十七日將行軍撤回大營而援賊已分一萬餘人先走金牛上竄山坡七月初四日派同知蔣益澧等分

率各營出師於紙坊以禦之賊之行抵金牛者
覘知有備遂折而併力於武昌縣之葛店以趨
洪山之後初十日蔣益澧等仍轉紮魯家巷實
爲洪山後路之總要十一日該逆分十三股排
列而至每股一二千人旗幟林立我軍分路進
擊殺賊四百餘名十二日水師遊擊鮑超等由
沙口下駛乘勢將樊口之浮橋燒斷又登岸燬

其陸路之壘都司喻吉三於黃州城下燒賊船
數隻旋即回泊沙口魯家巷兵力尙單臣又派
副左寶營七百人以益之十三至十五日賊兩
次撲營官軍先後斃賊七百餘名查石逆自上
年由鄂入江西攻陷吉安以後潛由江西九江
安徽祁門至金陵方鵬張於下游復回竄於武
漢逆燄頗熾必應慎以持之臣之中路李續賓

之東路合計勇丁一萬餘人刻下抽調四千七百
人於魯家巷迎勦臣營祇三千人洪山亦不
過四千餘人城中困獸固不可稍有疏縱而外
援沓至亦不能不分股迎勦至臣營後面可通
金口紙坊者約有三路臣先期挖掘長濠濠內
築壘每壘可容二百人仿古人礮堡之式以資
防禦諒不致四路侵軼致爲驚擾而臣亦得以

專勦城中之賊並分兵以勦援匪此先期布置之情形也奏入

上命軍機大臣傳諭官文胡林翼曰武漢賊勢久蹙因官軍不能實力進攻致下游賊黨得以徐圖援應武昌南路本無布置黃州之兵復撤則東路賊匪亦將源源而至惟城中之賊旣已窮蹙自應迅速進攻剋日收復則外來賊衆絕望自易勦滅著官文胡林翼

悉心籌畫併力攻勦毋得再涉延玩至湖北援賊號稱數萬若非裹脅無業游民安得如此衆多朕聞皖楚曾經被擾之區牧令或潛匿鄉村爲苟安之計巨室則遷徙一空城鄉小民貿易傭趁者無計謀生遂致被賊裹脅是以賊黨愈聚愈多兵勇不敷抵禦實爲今日受病之源若不急圖變計正本清源將誅不勝誅伊於胡底前諭各督撫各按地方情形實行團

練官文胡林翼職任封圻責無旁貸著留心選擇賢
能大員分投督辦如黃州崇通等處皆爲賊匪竄擾
出沒無常苟能慎選循良星羅碁布招集流亡實力
團練在小民有所依歸不至流而爲匪則賊援日少
賊勢日孤未始非軍務之轉圜也該督撫等毋得視
爲迂緩致誤事機

同日

上命軍機大臣傳諭和春鄭魁士曰昨因向榮在丹陽軍營病故已命怡良暫署欽差大臣接辦軍務因念江南軍營現在帶兵大員乏人和春曾在向榮軍營隨同打仗於江南情形較爲熟悉著卽馳赴丹陽軍營協力相機堵剿再行聽候諭旨鄭魁士現在懷遠所有和春總統之安徽軍務卽著鄭魁士接辦和春著俟鄭魁士到營交卸後卽行迅速起程毋稍遲緩

二十四日己卯福興奏言七月初五日逆匪三四

千人突撲五里牌地方經總兵張國樑等分路
攻擊殲斃逆衆甚多餘匪向西南之十里牌賓
村回奔追殺無數初六日又出賊二三千人來
犯城西營盤我軍先於黃土橋設伏該逆甫向
前進捷勇連放大礮斃賊一百餘名該逆且戰
且退突有十里牌賓村各壘賊匪出巢接應我

軍爭先衝殺又斃匪數百名其時協領輯順等
帶領馬隊包抄賊後伏兵亦四起橫截該逆潰
竄回巢一路掩殺甚衆兩日之戰共計斃匪一
千餘名該逆受此懲創兇燄更挫連日堅伏不
出自初九日向榮出缺後臣密商張國樑嚴飭
各營倍加防範一面將東西兩路營盤向前移
紮緊逼賊壘晝夜用大礮轟擊逆勢不支卽於

十三日分股宵遁一股竄往寶堰一股牽掣我軍當經張國梁派馬步各隊乘夜攻擊擒斬數百名該逆敗回白兔一帶我軍一路追勦斃匪甚多卽將河東河西賊壘十一座概行踢毀臣等以寶堰一鎮關係內竄金壇溧陽之路最爲緊要當派遊擊虎坤元帶兵二千餘名問道馳赴金壇助勦旋探該逆復分兩股一竄金壇一

奔溧陽臣等趕卽添派兵勇二千六百五十餘
名飭令參將魯占鰲等管帶前往統由總兵虎
嵩林會商駐守溧陽之總兵明安泰相機進剿
十五日又添派參將李定太等挑選勁旅二千
名帶赴金壇合之遊擊李鴻勳所帶一千餘名
計數將及一萬兵力不爲單弱攻勦尙易得手
惟查該縣接壤溧陽有關蘇浙門戶而逼近常

州各屬僻徑甚多亟宜嚴扼內犯杜其旁走荆
宜下竄常郡之路臣等一面嚴飭援剿各員乘
賊布置未定迅解金壇之圍總期以勦爲堵勿
令該逆蔓延分竄一面由大營再行撥兵一千
名派員速赴常州聽候督臣怡良調遣此時匪
蹤雖去丹陽稍遠而回竄亦屬意中之事現探
得白兔以上直達句容逆勢聯絡往來如故卽

溧水東壩一路並須妥籌兼顧原不得以金壇
一隅之地牽掣我軍全勢如果金壇城圍立解
卽可移軍迎賊所向爲步步前進之計若勦辦
稍稽時日或該逆別有動靜則臣與張國樑二
人趕緊酌量一人前往督勦免致顧此失彼再
張國樑槍傷尙未合口該總兵心急如焚不勝
焦切之至合併陳明奏入

上命軍機大臣傳諭怡良福興張國樑曰初五初六兩日逆匪出撲經官軍勦敗後分股宵遁雖河東河西賊壘均已蹋毀而逆黨圍攻金壇奔竄溧陽內犯愈急該二縣均爲蘇浙門戶儻復旁趨荆宜下窺常郡大局更憂掣動該將軍奏赴援金壇之兵計數將及一萬足敷攻勦金壇解圍後卽著步步追勦未可以隅之地牽掣全軍如果情形緊急卽著福興張國

樑酌分一人馳往督辦怡良暫署欽差大臣此時自
已前往丹陽就近調度賊匪聲東擊西計甚狡譎丹
陽既有重兵扼守更慮其旁竄他處不可不加意嚴
防東壩直通無錫現在尙爲賊踞著怡良等飛飭明
安泰進紮定埠速攻東壩絕其內犯之路張國樑前
受槍傷瘡口未合著發去如意拔毒散一料交該總
兵祇領趕緊醫治就痊以慰朕懷

二十八日癸未宋晉奏言查東壩上通甯國太平

蕪湖下瞰蘇常各郡實爲皖蘇浙三省鎖鑰江
長貴秦如虎等互相推諉以致險要轉爲賊占
現在駐紮溧陽之明安泰兵力已不爲薄如能
擇險徇攻原可相機克復第聞所帶之兵分屯
城廂寺院毫無紀律並有縱兵搶掠放火延燒
房屋情事似此悍慢之卒賊氛一至立見潰逃

是東壩以下堵剿全不足恃臣再四籌思丹陽雖爲內竄正路而現當重兵屯聚屢得勝仗賊必不至遽行窺伺可否請

旨密飭督臣怡良與張國樑審度機宜揀帶銳兵急趨溧陽由梅渚鄧埠紅蘭埠三路進擣逆賊素畏張國樑威名不虞驟至勢必驚潰定能一鼓克復再行另選紀律嚴明之將帶兵屯紮東壩則

江浙後路鎖鑰永固矣

宋晉又奏言前因徽甯兩郡爲江浙屏蔽奉

旨特設皖南道缺並經江督請以前甯國府鄧瀛升補

皖南道缺復經皖撫福濟以顏培文保升甯國

府缺原冀熟悉地方情形可以聯合紳民早籌

捍禦且聞浙省籌濟餉需及徽郡捐輸爲數不

少地亦有險可憑乃賊自祁門等縣竄入守禦

毫無其竄至甯國之賊不過脅從餘衆被偏先
驅而城守先空頃刻被陷是皖南甯國之不能
得人已可概見似應另

簡明幹之員接辦以期迅復要區查前任福建臬司徐
宗幹曾任台灣道於勦捕事宜胸有方略又前
任江西撫臣張芾現在徽州幫辦防務熟諳地
方又浙江候補道繆梓久管浙省防局於徽甯

情形均所熟悉可否請

旨簡擇一員權攝皖南道假以事權責令會督鄧紹良
江長貴等迅圖克復甯國其甯國府可否卽

飭簡任皖南之員自行保舉一員俾稔其才能得以同
籌攻勦奏入

上命軍機大臣傳諭怡良福興張國樑何桂清曰據宋
晉奏明安泰現駐溧陽所帶之兵分屯城廂寺院毫

無紀律並有縱兵搶掠延燒房屋情事請飭張國樑
馳往勦辦等語東壩爲蘇浙咽喉明安泰兵力已不
爲薄何以並未見進攻東壩轉在溧陽縱兵焚搶此
等漫無紀律之軍安能望其克敵著怡良等密速查
明如果實有其事卽將明安泰並所帶之兵全行撤
回嚴叅懲辦另派得力鎮將酌帶勁旅馳往東壩實
力堵剿以防內竄張國樑現在傷未平復且丹陽金

壇均形喫緊未便令其專勦一處所有應行調撥兵將著怡良等妥速籌派皖南道鄧瀛甯國府知府顏培文守禦無方本係應行革職之員因一時接替乏人是以暫令留任該府丞所保浙江候補道繆梓一員是否能勝皖南道之任卽著怡良會同何桂清察看具奏此外如有賢員堪勝皖南道並甯國府要缺者亦著據實保奏候旨簡放

欽定剿平粵匪方略卷一百六十 丙辰年

八月初一日 乙酉 官文奏言漢陽賊匪久踞兼旬

以來我師屢偏賊壘七月十一日已革總兵訥
欽等於東城外鐵門關一帶密派兵勇向卡施
放火箭火彈沿燒卡內房屋多間毀其沿江外
卡奮撲內卡又因濠深壘厚賊礮如雨我兵後
隊未能繼進十七日臬司李孟羣等率各隊往

攻西門外堅壘約會各營分攻賊卡該逆由西門出賊三千餘人分三股而來我軍亦分三路迎敵都司張得勝先時帶勇伏匿從旁抄入賊之右路斃悍賊數人中路之賊經王國才督勇迎擊殪其賊目乘勢掩殺左路之賊又爲總兵楊昌泗等兵勇前後夾擊賊均敗竄回巢蘄州黃岡等處逆匪仍然嘯聚近又探聞逆渠石達

開與僞衛天侯曾逆僞春官丞相張逆糾集江西九江老賊興國大冶奸民共數萬人由南岸至武昌欲圖解武漢之圍並奪洪山要隘已陸續竄省城之山坡王家店一帶距胡林翼等大營十餘里反數十里不等賊勢日增雖北岸剿守同時喫緊兵力難分而武昌各營後路堪虞不能不統籌全局先其所急臣於漢陽各營馬

隊中擇精壯四百餘名飭令分起渡江復撥步
隊精勁兵勇選員管帶亦由上下游渡江前往
胡林翼大營合力助剿臣督飭北路各營日夜
嚴防相機攻擊奏入

上命軍機大臣傳諭官文胡林翼駱秉章曰漢陽逆賊
被圍日久其勢已困必須乘勢進攻力圖克復雖賊
壘堅厚槍礮尙多亦當設法攻剿出奇制勝斷不可

藉詞延宕致誤事機官文總統諸軍現當攻勦喫緊之際必將親督兵勇奮力圍攻若紮營處所距賊太遠恐呼應不靈難期得力武漢逆匪倚爲犄角若能克復一城則賊勢已孤併攻較易著官文胡林翼各飭將弁水陸並進毋得日事遷延致干重咎至賊援麇至號稱數萬其中多裹脅游民未必盡如粵匪之兇悍惟旣欲攻城又禦援賊不免受其牽掣湖南省

屑齒相依道路較近未知有無可調兵勇前往湖北
協剿著駱秉章酌量情形趕緊辦理如能抽撥兵勇
速派得力之員統帶前赴湖北會剿得此一軍以禦
賊援則官文等可專力攻剿克復城池不至兩面受
敵爲賊牽掣矣

官文又奏言武漢賊勢日蹙專待外援前次黃

現復由武昌南岸來援賊衆以數萬計臣先由
北岸各營分撥馬步各隊自沌口渡江與胡林
翼兵勇合力勦辦近又探知該逆分賊三千餘
於南岸下游之青山港築壘搭造浮橋勢必糧
道潛通城賊又資接濟現復由臣函商楊載福
都興阿於沙口營內選撥馬步兵勇隨同礮船
整隊渡江截賊青山白羊橋來路與水師聯絡

集賢堂卷之三
四
兜勦仍咨商胡林翼分兵各路堵禦協助李續
賓上下夾擊使援賊不能相顧臣乘此督兵日
夜力攻漢陽以分賊勢

同日何桂清奏言甯國賊匪於七月初六日在
南門外添築土壘與我軍營盤對峙鄧紹良飛
致都隆阿派令都司富保等馳往勦捕斃賊三
百餘名我軍一無損折鄧紹良以郡城西路賊

援未斷棟派守備石玉龍等帶勇赴西門外紮營該逆從西門分股三千餘人衝突而來鄧紹良隨帶親兵督勦分左右兩路抄襲斃賊數十名賊奔回巢西門新營已於是日築成初七日該逆又從西門撲出二千餘人犯我新營鄧紹良飛調參將蕭知音等分三路迎敵斃賊二百餘名賊勢稍卻後隊賊援踵至我軍乘勝追勦

直至西門城下殺賊無算此甯國擊賊獲勝之情形也據秦如虎等稟報七月初七日東壩之賊分股二千餘人由定埠竄至距鍾橋五里之馬長山初八日該逆又從金陵溧水添匪五六千人直撲建城秦如虎出北門江長貴出東門分路截剿斃賊甚多該逆擁衆退至鍾橋於橋上率衆抗拒守備于紹昌千總會得勝首先衝

上鍾喬立斬僞檢點楊彪僞指揮黃金幅二賊
目逆勢大潰我軍奮勇窮追沿途俘斬三四百
名追過分龍廟餘匪仍回東壩此建平勦賊獲
勝之情形也查甯國西南兩路賊援未絕今我
軍於西路紮定新營復將南門賊壘一律踏平
西南兩路漸就肅清外援旣絕正可設法圍攻
至建平一路賊復由東壩前來窺伺屯紮馬長

山希圖攻襲縣城我軍於此次痛加勦洗斬馘
極多實足以整軍威現在皖南各路防勦均形
喫緊鄧紹良於甯國軍營抽撥劉福林一軍又
於涇縣防所飭調滬勇七百餘名前赴廣德臣
於浙省派鶴勇四百名又從明安泰處調回浙
勇四百名飭赴建平均交秦如虎調遣此數起
俱係得力之師以之分布廣建一路較爲嚴密

聞

仲孫懋與秦如虎相商於十三日自帶一軍出
紮鍾橋力扼要衝與建城爲犄角之勢臣現飭
鄧紹良激勵全軍乘勝攻復郡城並檄秦如虎
等步步移營會同明安泰迅速進剿東壩均奏
入報

初五日

己丑

西安將軍福興福建漳州鎮總兵張

國樞奏言逆匪由丹陽竄至金壇當經派往官軍八千餘名統歸總兵虎嵩林督帶進剿乃節節遲延毫無調度致賊於近城西北迤東處所連紮多營阻我進步兩次接仗迄未得手臣張國樞於七月十九日抵金壇催隊前進並越河添築營盤使城內外聲勢相應一面酌撥兵勇繞道入城協力固守以備夾攻二十一日黎明

渡河進攻賊壘該逆突出千餘人來撲新營又分股二千餘衆抄我河西舊營後路當派參將李定太等分路抄殺臣張國樑親督衆軍奮力直前斃匪甚衆立將河西抄營之賊擊敗其撲犯新營之賊經遊擊戴文英等督領精銳各勇過河衝殺斃匪多名逆勢不支潰亂奔回二十二日分兵中左右三路由東門賊壘進攻該逆

出巢拒敵我軍三面兜擊馬隊分兩翼衝突乘勢掩殺直逼賊巢又斃賊數百名所有選帶入城之兵勇二千名均各酌帶軍火先後由南門衝入城內都司馮子材亦乘擊賊獲勝之時隨各兵進城協守城內人心大定查該逆自丹陽遁走後並未竄往溧陽其全股屯集金壇意欲奪踞此城爲徐圖內犯之計我兵現於東路各

處要隘分紮堵禦儘該逆被勦窮蹙復圖竄回
丹陽則北路珥陵延陵一帶仍須駐兵嚴防頃
因兵勇無可分撥臣福興臣張國樑酌商或將
前此派防宜興之練勇一千餘名察看該處緩
急卽飭調回防守珥陵以杜回竄之路此次陣
亡之守備李慎等應請

旨飭部從優議卹奏入

上諭內閣曰此股逆匪竄撲金壇經張國樑督隊攻勦連日獲勝並派都司馮子材等選帶兵勇入城協守卽著該總兵等督飭將弁內外合攻迅掃逆氛虎嵩林赴援遲延情節可惡著怡良福興張國樑據實嚴叅懲辦以肅軍令其陣亡之守備李慎把總戴魁額外吳祖貴均著交部從優議卹

同日廉兆綸奏言臣查撫建廣饒四郡如輔車

之相依當饒州告陷時臣以信郡愈危建圍愈
難鬆勁故奏請以閩兵一半來防廣信仍以一
半留勦建昌然究以建郡所留之兵尙形單薄
時恐該逆破圍出擾幸而陳上國尙未移營饒
州已報克復臣卽飭該副將毋庸馳赴信郡仍
與張從龍等併力規復建昌至廣信練勇現在
飭駐貴溪未敢輕動緣饒城雖復而逆匪尙踞

四十里街去饒郡僅四十里近復探聞分赴景德鎮滋擾撫州雖經大兵攻勦疊獲勝仗然賊之大股實聚於撫州臨江二府近日逆首黃玉崑又帶悍賊二三千名伺隙闖入撫城意圖抗拒是逆匪旣愈聚愈衆我兵復愈老愈疲信勇祇二千餘人若北僭饒西備撫南備建勢必不及臣再四籌維惟有暫駐三郡適中之地相機

進勦查江西毗連各省近日如廣東福建湖南
皆有兵勇進援獨廣信一帶尙覺空虛浙兵雖
近在玉山而該省爲甯國所牽掣信郡旣稱完
善而藉爲屏蔽之浙省又爲財賦之區久爲賊
所垂涎若恃此二千餘名之勇當撫建饒郡三
面之衝實屬不敷分布今日江省情形自以力
保廣饒爲先欲保廣饒不能不兼籌撫建應請

飭下曾國藩文俊統籌全局迅克撫建保全廣饒實於
江省大有裨益奏八

上命軍機大臣傳諭曾國藩文俊廉兆綸曰廉兆綸所
稱閩兵須全留建昌自因撫建等處均有賊匪滋擾
恐兵力單薄起見惟現在江蘇丹陽一帶情形萬分
喫緊必得各路援兵厚集方足以資攻勦前據曾國
藩等奏饒郡克復業將陳上國所帶閩兵一千五百

名飭赴江南軍營已諭令怡良等飛速催提儘此項官兵道經廣信廉兆綸不准截留防守致誤大局至所奏信勇祇二千餘名不能當撫建饒郡三面之衝亦係實在情形著曾國藩文俊迅卽酌撥兵勇前往廣信協力防勦現在南康饒州均已克復廣東湖南援兵助勦各有起色該侍郎等務當統籌全局設法兼顧趕緊克復撫建保衛廣饒毋令賊匪紛竄

初七日 辛卯 福濟奏言欽奉

諭旨命提臣和春馳往丹陽協勦令鄭魁士接辦安徽
軍務現在向榮病故局勢變更何敢諄諄請留
惟是臣與和春昕夕籌防每次督兵臨陣臣見
其匹馬衝鋒帶兵將帥似此者實無多人皖省
士民倚爲長城渡江南去實非皖民仰望之心
鄭魁士現在懷遠督勦捻匪運籌調度藉以鎮

靜居民遏賊紛竄若遽令馳赴三河則剿擒之事專恃郝光甲等萬一稍有貽誤或勾結粵匪或北竄淮徐其勢更不可問若以勦辦捻匪專交鄭魁士臣親赴三河接辦和春軍務原可變通辦理而無爲巢縣之賊意在窺伺廬城前雖擊沈船隻昨報又來礮船數十隻在沿湖遊駛當此賊艇麇集統兵大員一有轉移未免人心

皇惑思維再四惟有仰懇

天恩俯念皖省軍務喫緊飭令提臣和春照舊督辦於
江北全局大有裨益奏入

上命軍機大臣傳諭和春福濟曰據福濟奏稱皖省軍
務喫緊請留和春督辦等語丹陽大營關繫蘇浙兩
省保障朕素知和春尙有將略且曾在向榮軍營江
南情形亦能熟悉是以調往丹陽卽欲命其爲欽差

大臣俟到江南再降諭旨鄭魁士在皖屢著戰功接
替和春總統軍務諒能勝任該撫現已病痊亦可與
鄭魁士和衷商榷會籌防勦和春福濟接奉此旨著
卽知照鄭魁士迅速折回廬州接辦安徽軍務和春
俟鄭魁士到營交卸後迅速起程馳赴丹陽軍營聽
候諭旨

初十日
甲午

上諭內閣曰江南提督和春著授爲欽差大臣卽日馳赴丹陽接受關防督辦江南軍務

十四日戊戌德興阿翁同書奏言近日瓜鎮賊匪

互相聯絡往來靡定臣等於七月十九等日屢

次督師進攻而五里莊四里鋪一帶該逆空隄
引流到處環阻官軍節節鳬渡冒險而進賊壘
槍礮較前益密連旬以來該逆由土橋出擾樸

樹灣等處屢經參領富明阿等帶兵擊退每殺賊三五十名不等惟近獲奸細均有該逆分股由儀徵往六合之供現在通飭江北各營嚴備一面乘其謀竄未遂之先設法攻勦爲一舉殲除之計特於揚儀馬步各隊中擇其年強膽壯尤爲奮勇者以備設奇破敵之選並邀水師總兵陳國泰來營密商燭其剋日多備火攻器具

遇風色順利之時卽駛至瓜州大口乘風縱火
復飭其遴選水營兵勇臨時各駕小船接應洎
水登岸與陸路兵勇夾擊又密飭署儀徵縣知
縣楊鍾琛將該縣水勇趕緊募齊與舟師會合
屆期分路齊進臣等亦親督東西兩岸馬步各
軍隨帶各項攻具設法擣巢以期一鼓殲除奏
入報

聞

十五日 己亥

上諭內閣曰和春已授爲欽差大臣督辦江南軍務所有安徽軍務著派提督銜署壽春鎮總兵鄭魁士會同福濟督辦

十六日 庚子 怡良奏言丹陽逆匪於受創後仍環

攻金壇縣城七月二十五日參將李定太等帶

領馬步各隊分三路攻擊張國樑親督守備馬騰超居中策應各軍衝至濠邊槍斃多賊城內之都司馮子材等同時督兵勇擁出南門亦分三面進勦焚燒該逆望樓斬擒約百餘名立將城南頭座賊巢毀平二十六日挑派官軍護送火藥由南門入城一面出隊牽制賊勢槍斃伏牆賊匪多名二十七日分兵督攻南門外賊壘

燒燬更樓一間正在得手之時東西兩門之賊
突來二三千人內有騎馬賊目往來指揮我軍
用洋槍擊斃乘勢衝殺將逆衆壓敗回巢二十
九日派隊暗擊城東賊壘李定太張玉良等攻
第一座礮臺官軍以藤牌遮護一齊衝至岡下
斬馘守礮之賊甚多遂將礮臺平毀復乘勢擁
上土岡燃燒藥桶逆衆越牆逃竄砍斃燒死者

無數又將第二座礮臺踏毀突有北門大股逆
匪來援張國樑督隊衝殺殲斃數十名該逆先
於西門外偷挖地道藏放火藥當我兵力攻礮
臺之時突然點發轟坍城牆三丈有餘幸城內
遊擊李鴻勳等督飭兵勇嚴守牆缺施放槍礮
斃賊數十名其轟發地道之時震坍民房數間
壓死逆匪百餘人查該逆在金壇縣城外築壘

環攻我兵擊其一面彼卽三面來援現在官兵
在城外者雖有六千餘名紮營東北僅可堵其
兩面其南門一面尙屬空虛復由丹陽大營抽
撥兵勇二千五百名前往堵剿以免曠日持久
所有陣亡之四川把總張殷元等及前七月十
七日在金壇縣打仗陣亡之貴州把總楊勝得
相應請

旨交部從優議卹奏入

上諭內閣曰金壇節次勦賊獲勝著張國樑督飭在事將弁將賊匪悉數殲除並設法杜其旁竄免致蔓延爲患陣亡之四川把總張殿元五品藍翎勇目鄒得龍均著交部從優議卹前在金壇打仗陣亡之貴州把總楊勝得著一併交部從優議卹

怡良又奏言明安泰駐守溧陽一軍前此逆匪

未竄金壇之時原爲專顧東壩一路此時賊股屯踞金壇城外卽應分兵迎勦該總兵前派勇五百名赴宜興協防並另派都司陶茂林管帶兵勇一千四百餘名往援金壇業經張國樑派令八城協同守禦查溧陽距金壇不及百里水陸直達毫無阻隔且西連溧水東接宜興目下旣須旁顧定埠又須上扼金壇面面當衝防守

聞

倍形喫緊已由臣札行該總兵能否分兵進剿
東壩飭令相機辦理奏入報

二十日甲辰怡良奏言八月初三日臣張國樑督

令參將魯占鼇等分投攻撲金壇東門賊壘因
牆高濠闊未能得手初四日各路援兵將次到
齊城內遊擊李鴻勳等瞭見西門外逆匪赴鄉

擄掠卽派張朝光等督帶兵勇潛出西門分兩路攻擊西街賊巢該逆猝不及防被我兵搶入連撲賊巢十餘處大股逆匪蟻擁來援我兵收隊回城該逆跟追近濠武生陳震指揮團丁施放槍礮連斃數賊始行擊退該武生亦被賊礮中胸登時陣亡初五日出隊在南門外移紮營盤四座該逆率黨五六千人前來攻撲我軍奮

勇直前槍斃騎馬黃衣賊目乘勢進勦該逆敗
退搃橋而守李定太匹馬當先督帶兵勇數十
名槍上橋梁砍斃劇賊十餘名虎坤元從後掩
殺該逆敗退回巢臣張國樑乘機直擣南門賊
壘督飭虎嵩林率領李定太等四面圍攻該逆
蒼黃失措我軍乘勢砍殺賊匪不計其數餘匪
竄入第二座巢內我兵進攻適城內遊擊李鴻

勳督率馮子材等帶同團丁從南門橫衝而出
一併擁至賊壘李定太等帶勇躍過濠溝拋擲
噴筒火罐壘中火起我兵乘其荒亂大隊壓入
將巢內之賊盡行殲斃進攻第三座逆壘各兵
勇從槍礮叢中踰牆而登該逆驚潰衆軍破柵
而進刀砍矛刺賊屍徧地餘匪奔逃壘後土岡
有礮臺一座該匪排列大礮連環施放我兵未

能撲近臣張國樑密令李鴻勳等選帶藤牌手
從岡後抄上該逆卽由兩旁逃竄將逆壘第三
座礮臺平毀東西兩門之賊二三千趕來救援
我兵首尾夾擊該逆披靡奔回舊巢統計是日
斬馘首級一千五百顆生擒賊匪二十名至初
六日子刻逆匪宵遁城圍立解臣張國樑卽飭
虎嵩林等倍道追剿直至茅山剿殺不下千名

該逆分作兩股一走句容一由茅山南路旁竄
李定太等帶領馬隊自茅山間道兼程追襲斃
匪三四百名餘俱爬山越嶺四散逃竄臣張國
樑查茅山南路近接溧陽卽令虎嵩林酌帶兵
勇馳赴溧陽會同明安泰相機堵剿其李鴻勳
一軍仍回金壇臣張國樑卽親統各軍由延陵
珥陵一路折回丹陽相機進取句容所有守城

陣亡之金壇縣武生陳震相應請

旨從優議卹奏入

上諭內閣曰逆匪自丹陽竄撲金壇經總兵張國樑督兵進剿與城內駐守之遊擊李鴻勳等兵勇內外夾攻立解金壇城圍所辦尙屬得手著怡良仍飭張國樑等督軍將敗殘餘匪搜除淨盡乘此聲威各路堵剿力圖進取毋令逆勢紛竄蔓延陣亡武生陳震著

交部從優議卹

二十一日乙巳何桂清奏言甯國賊匪被我軍疊

次痛剿勢已窮蹙惟涇縣竄賊雖經周天受屢
次勦辦獲勝力保城池而南陵青陽賊援麕集
與徽嶺處處可通江長貴於七月初八日在建
平軍營會同秦如虎等擊退賊匪以後隨卽帶
勇由績溪入徽其時南陵之賊竄至涇縣張芾

飭令將長勝勇派赴涇縣協勦該署鎮行抵徽
州而青陽之賊三四千人於八月初二日竄入
太平縣境張芾卽飭該署鎮帶勇出翁嶺迎勦
尙恐該逆潰竄旌德績溪臣已飭周天受準備
策應但周天受全軍僅千餘人甚爲單薄鄧紹
良先將調防廣德之李恆淞一軍飭令折回涇
縣以之兼顧南陵青陽兩路兵力尙屬不敷張

芾已咨商鄧紹良隨時察看緩急另籌接濟至
建平溧陽兩路明安泰秦如虎本已約期會攻
東壩嗣後因丹陽之賊竄往金壇明安泰以溧
陽之師分援金壇派防宜興業已分兵不少而
秦如虎駐紮建平仲孫懋駐紮鍾橋亦祇能力
扼要隘杜其內竄不能分兵紮出定埠應俟金
壇解圍再與明安泰約會進剿惟建平一帶道

路紛歧尙慮逆蹤分竄李恆淞一軍旣回涇縣
臣復由省撥金華勇六百名交慶廉派防廣德
並咨會鄧紹良策勵全軍務須早日攻克甯郡
以期仰紓

宸廑奏入

上命軍機大臣傳諭怡良福興張國樑何桂清曰昨據
怡良等奏金壇解圍已飭秦如虎由定埠進取東壩

此時仍當飭令明安泰約會該副將擊退東壩占踞之賊杜其內竄建平爲入浙要路李恆淞旣回涇縣該撫卽飭派防廣德之臬司慶廉等嚴密布置一面飛咨鄧紹良策勵全軍乘賊窮蹙之時攻克甯郡庶外援之賊失其所恃不致再生覬覦至徽郡兵單其南陵青陽竄匪並著該撫察看緩急飛咨鄧紹良酌量辦理毋稍疏懈